



Autorima tekstova obratio se i ambasador Johann Sattler



Dr. Neven Anđelić je bio u ulozi moderatora

Prijatelji naše zemlje imaju nove ideje

Učesnici projekta Ja bih BiH okupili su se na online konferenciji, a obratio im se i ambasador Johann Sattler


Zoom konferencija autora 20 tekstova objavljenih u specijalnom izdanju Oslobođenja - Ja bih BiH, posvećenom izbornim reformama u našoj zemlji, a u okviru obilježavanja 26. godišnjice parafiranja Dejtonskog mirovnog sporazuma i 78. godišnjice ZAVNOBiH-a, održana je u ponedjeljak, 22. novembra, na prijedlog dr. Nevenke Tromp. Moderator konferencije bio je dr. Neven Anđelić, inicijator projekta i autor teksta "Diskriminacija može biti zaustavljena", a u 100-minutnoj konferenciji učestvovalo je 15 autora. Učesnike je pozdravila Vildana Selimbegović, glavna i odgovorna urednica Oslobođenja, te iskazala zahvalnost eminentnim stručnjacima iz regiona i svijeta za nesebičan doprinos posebnom izdanju naših novina. Učesnicima se obratio i ambasador Johann Sattler, šef Delegacije EU u BiH i specijalni predstavnik EU u Bosni i Hercegovini, koji je uputio zahvalu urednici Selimbegović i Oslobođenju zbog objave specijalnog izdanja, ali i organizacije Zoom konferencije.

Diskriminacija i korupcija

- Kada sam se vratio sa puta u nedjelju ujutro, dočekalo me specijalno izdanje Oslobođenja - Ja bih BiH i to je popravilo moj dan. Pročitao sam veći dio izdanja, vaše tekstove u kojima pišete o stanju krize sa osvrtom na izborne reforme, prijedloge koji mogu pomoći zemlji da unaprijedi trenutno stanje i načine kako poboljšati funkcionalnost sistema, poručio je ambasador Sattler.

Podsjetio je na važnost rješavanja problema diskriminacije unutar bh. izbornog sistema.

- Pokušavamo da uklonimo diskriminaciju iz izbornog sistema i svi ste pisali o tome. Jedan od primjera je slučaj Sejdić-Finci. Jednako je važno ukloniti i korupciju. Neki od vas su, mislim dr. Galijaš, pisali o potrebi



Naslovna strana specijala Ja bih BiH

pokretanja apolitičnog dijela populacije, istakao je ambasador, te dodao da bi veći angažman, 10 do 15 posto dijela apolitične populacije, zasigurno napravio razliku u zemlji.

Govoreći o diskriminaciji, ambasador je naglasio da već sedmicama i mjesecima razgovaraju sa predstavnicima vlasti.

- Učestvuju OSCE/ODIHR i Venečijanska komisija, i to je veoma važno za nas, jer oni i Vijeće Evrope moraju odobriti prijedloge. Oni su tu da bi testirali moguće pravne izazove, kako ne bismo imali neprijatnih iznenađenja kasnije. Veoma je važno da nađemo načine kako zaustaviti trenutnu političku krizu. Nadali smo se da će biti završena do sada, ali moramo računati da ona i dalje traje, rekao je ambasador Sattler, te napomenuo da se radi i na reformi pravosuđa.

Autori će u narednom periodu raditi na kreiranju Policy memoranduma, a u planu su i novi sastanci

Dodao je da trenutno rade na preporukama, te pokušavaju ukloniti barijere u procesu glasanja, registra birača, lista, što je realistično i pomoći će u procesu sprečavanja korupcije.

- Čuli smo puno kritika, kao na primjer da se baziramo na dvije stranke, ali to nije tačno. Razgovaramo sa svima. Vjerujemo da je moguće i da možemo uraditi nešto, moramo vidjeti opuštanje situacije prije praznika, posebno kada govorimo o Parlamentu BiH. Neki su u radovima pisali i o glasu građana, a mi smo već ranije počeli projekat Skupštine građana, rekao je ambasador.

Dr. Neven Anđelić je ukratko prezentirao radove, te dao mogućnost prisutnima da kratko predstavljaju najvažnije ideje i prijedloge.

Policy memo

Prof. dr. Francesco Palermo, autor teksta "Je li učešće moguće rješenje ustavne zagonetke", pitao je zašto ne eksperimentirati malo više i omogućiti participativnu demokratiju.

- BiH treba viziju za budućnost, rekao je mr. Christophe Solioz, autor teksta "Bosni je potreban oštar pristup".

U radu konferencije učestvovali su i: prof. dr. Florian Bieber, prof. dr. Petra Roter, univ. prof. dr. Joseph Marko, prof. dr. jur. Jens Woelk, dr. Jessie Barton Hronešová, prof. dr. Dejan Jović, dr. Marika Djolai, dr. Nevenka Tromp, dr. Soeren Keil, prof. dr. Nebojša Vladislavljević, prof. dr. Mladen Mrdalj i dr. Mareike Fröhlich.

Na prijedlog dr. Djolai, autori su se dogovorili da, na osnovu napisanih radova, političkim akterima i svim učesnicima u izbornim reformama, upute Policy memo, memorandum u kojem će iznijeti prijedloge, stavove, s ciljem da pruže dodatnu podršku reformskom putu BiH. Naše specijalno izdanje dostupno je na našoj web stranici, na našim i engleskom jeziku.

MATEA JERKOVIĆ